



白氏文集卷第三十五

律詩

一百首
并序

開成己未歲余蒲柳之年六十有八冬十月甲寅旦
始得風痺之疾體癯目眩左足不支蓋老病相乘時
而至耳余早棲心釋梵浪跡老莊因疾觀身果有所
得何則外形骸而內忘憂患先禪觀而後順鑿治旬
月以還厥疾少間杜門高枕澹然安閒吟諷興來亦
不能遏因成十五首題爲病中詩且貽所知兼用自
廣昔劉公幹病漳浦謝康樂臥臨川咸有篇章杼詠
其志今引而序之者慮不知我者或加誚焉

初病風

六十八衰翁乘衰百疾攻朽株難免蠹空穴易來風

肘痺宜生柳頭旋劇轉蓬恬然不動處虛白在胷中
枕上作

風疾侵凌臨老頭血凝筋滯不調柔甘從此後支離
臥賴是從前爛熳遊迴思往事紛如夢轉覺餘生杳
若浮浩氣自能充靜室驚飈何必蕩虛舟腹空先進
松花酒膝冷重裝桂布裘若問樂天憂病否樂天知
命了無憂

荅閒上人來問因何風疾

一床方丈向陽開勞動文殊問疾來欲界凡夫何足
道四禪天始免風灾色界四天初禪具三灾一禪無
火灾三禪無水灾四禪無風灾

病中五絕

世間生老病相隨此事心中久自知今日行年將七
十猶須慙愧病來遲

二

方寸成灰髮作絲假如強健亦何為家無憂累身無
事正是安閒好病時

三

李君墓上松應拱元相池頭竹盡枯多幸樂天今始
病不知合要苦治無李元昔予執友也杓直少予八
歲即世已九年微之少予七年
薨已八年矣今予
始病得非幸乎

四

目昏思寢即安眠足軟妨行便坐禪身作醫王心是
藥不勞和扁到門前

五

交親不要苦相憂亦擬時時強出遊但有心情何用
脚陸乘肩輿水乘舟

送嵩客

登山臨水分無期泉石烟霞今屬誰君到嵩陽吟此
句與交三十六峯知

罷灸

病身佛說將何喻變滅須臾豈不聞莫遣淨名知我
笑休將火灸灸浮雲維摩經云是身如浮雲須臾變滅也

賣駱馬

五年花下醉騎行臨賣迴頭嘶一聲項籍顧騅猶解
歎樂天別駱豈無情

別柳枝

兩枝楊柳小樓中嫋娜多年伴醉翁明日放歸歸去
後世間應不要春風

就煖偶酌戲諸詩酒舊侶

低屏軟褥臥藤床昇向前軒就日陽一足任他為外
物三盃自要沃中腸頭風若見詩應愈齒折仍誇笑
不妨細酌徐吟猶得在舊遊未必便相忘

歲暮呈思黯相公皇甫朗之及夢得尚書

歲暮嗚然一老夫十分流輩九分無莫嫌身病人扶
侍猶勝無身可遺扶

自解

房傳往世為禪客世傳房太尉前生為禪僧與婁師
德友善慕其為人故今生有婁之
王道前生應畫師王右丞相詩云宿世
是詞客前身應畫師王亦定

中觀宿命多生債負是歌詩不然何故狂吟詠病後
多於未病時已上病中十五首

歲暮病懷贈夢得時與夢得同患足疾

十年四海故交親零落唯殘兩病身共遣數音從是
命同教步蹇有何因眼隨老減嫌長夜體待陽舒望
早春新樂堂前舊池上相過亦不要他人

雪後過集賢裴令公舊宅有感

梁王捐館後枚叟過門時有淚人還泣無情雪不知
臺亭留盡在賓客散何之唯有蕭條鴈時來下故池

酬夢得貧居詠懷見贈

歲陰生計兩蹉跎相顧悠悠醉且歌厨冷難留鳥止
屋詩云瞻鳥爰止于淮之屋門間可與雀張羅病添

莊舄吟聲苦貧欠韓康藥債多日望揮金賀新命來

云若有金俸錢依舊又如何時夢得罷賓客除祕

酬夢得見喜疾瘳

暖卧摩綿褥晨傾藥酒螺昏昏布裘底病醉睡相和
末疾徒示爾疾末謂四肢餘年有幾何須知差與否

相去校無多

夜聞箏中彈瀟湘送神曲感舊

縹緲巫山女歸來七八年殷勤湘水曲留在十三絃
苦調吟還出深情咽不傳萬重雲水思今夜月明前

感蘇州舊舫

畫梁朽折紅窓破獨立池邊盡日看守得蘇州船舫
爛此身爭合不衰殘

感舊石上字

聞撥船行尋舊池幽情往事復誰知太湖石上鐫三字十五年前陳結之

見敏中初到邠寧秋日登城樓詩詩中頗多

鄉思因以寄和從殿中侍御史出副邠寧

想爾到邊頭蕭條正值秋二年貧御史八月古邠州
絲管聞雖樂風沙見亦愁望鄉心若苦不用數登樓

齋戒

每因齋戒斷葷腥漸覺塵勞染愛輕六賊定知無氣
色三口應恨少恩情酒魔降伏終須盡詩債填還亦
欲平從此始堪為弟子竺乾師是古先生

戲禮經老僧

香火一爐燈一盞白頭夜裡佛名經何年飲着聲聞
酒直到如今醉未醒

近見慕巢尚書詩中屢有歎老思退之意又
於洛下新置郊居然寵寄方深歸心大速
因以長句戲而諭之

近見詩中歎白鬚遙知閫外憶東都烟霞偷眼窺來
久富貴粘身擺得無新置林園猶濩落未終婚嫁且
踟躕應須待到懸車歲然後東歸伴老夫

對鏡偶吟贈張道士抱元

閒來對鏡自思量年貌衰殘分所當白髮萬莖何所
怪丹砂一粒不曾嘗眼昏久被書料理肺渴多因酒
損傷今日逢師雖已晚枕中治老有何方

病入新正

枕上驚新歲花前念舊歡是身老所逼非意病相干
風月情猶在盃觴興漸闌便休心未伏更試一春看

臥疾來早晚

臥疾來早晚懸懸將十旬婢能尋奉草犬不吠醫人
酒甕全生醖歌筵半委塵風光還欲好爭向枕前春

強起迎春戲寄思黯

杖策人扶廢病身晴和強起一迎春他時蹇跛縱行
得笑殺平原樓上人

夢得前所酬篇有鍊盡美少年之句因思往事兼詠今懷重以長句答之

鍊盡少年成白首憶初相識到今朝昔饒春長先

折令伴寒松取後凋昔登科弟夢得多居先生事終今同暮年洛下為老伴

貧猶可過風情雖老未全銷聲華寵命人皆得若箇

如君歷七朝夢得真元中及今仕七朝也

病後寒食

故紗絳帳舊青氍藥酒醺醺引醉眠抖擻弊袍春晚
後摩挲病脚日陽前行無筋力尋山水坐少精神聽
管絃拋擲風光負寒食曾來未省似今年

老病相仍以詩自解

榮枯憂喜與彭殤都儂人間戲一場虫臂鼠肝猶不
怪雞膚鶴髮復何傷昨因風發言長往今遇陽和又
小康還仙遠行裝束了遲迴且住亦何妨

皇甫郎中親家翁赴任絳州宴送出城贈別

慕賢入室交先定結援通家好復成新婦不嫌貧活
計嬌孫同慰老心情洛橋歌酒今朝散絳路風烟幾
日行欲識離羣相戀意為君扶病出都城

春暖

風痺宜和暖春來脚校輕鸞留花下立鶴引水邊行
髮少嫌巾重顏衰訝鏡明不論親與故自亦昧平生
殘春晚起伴客笑談

掩戶下簾朝睡足一聲黃鳥報殘春披衣岸犢日高
起兩角青衣扶老身策杖強行過里巷引盃閒酌伴
親賓莫言病後妨談笑猶恐多於不病人

送唐州崔使君侍親赴任

連持使節歷專城獨賀崔侯宦慶榮烏府一拋霜簡

去朱輪四從板輿行

崔郎中從鄉中連典四郡皆侍親赴任

發時正

沙鷗送到日方乘竹馬迎唯慮郡齋賓友少數盃春
酒共誰傾

春晚詠懷贈皇甫朗之

魏陽時節又蹉跎遲暮光陰復若何一歲中分春日
少百年通計老時多多中更被愁牽引少裏兼遭病
折磨賴有銷憂治悶藥君家濃耐我狂歌

春盡日宴罷感事獨吟

開成五年三月三十日作

五年三月今朝盡客散筵空獨掩扉病共樂天相伴
住春隨樊子一時歸閒聽鶯語移時立思逐楊花觸
處飛金帶縋腰衫委地年年衰瘦不勝衣

病中辱崔宣城長句見寄兼有舫綺之贈因

以四韻忽而訓之

劉楨病發經春臥謝朓詩來盡日吟三道舊誇收片

玉昔子考制策一章新喜獲双金信題霞綺緘情重

酒試銀觥表分深科策門生滿霄漢歲寒少得似君

心

前有別楊柳枝絕句夢得繼和云春盡絮飛

留不得隨風好去落誰家又復戲谷

柳老春深日又斜任他飛向別人家誰能更學孩童

戲尋逐春風捉柳花

池上早夏

水積春塘晚陰交夏木繁舟船如野渡籬落似江村

靜拂琴床席香開酒庫門慵閒無一事時弄小嬌孫

談氏外孫生三日喜是男偶吟詩篇兼戲

夢得

玉芽珠顆小男兒羅薦蘭湯浴罷時苜蓿春來盈女

手梧桐老去長孫枝慶傳媒氏鸞先賀喜報談家烏

預知明日貧翁具雞黍應須訓賽引鸕詩前年談氏外孫女初

生夢得有賀詩云從此引鸕鸕今幸是男前言似有徵故云

開成上行皇帝挽歌詞四首奉勅撰進

御宇恢皇化傳家叶至公華夷臣妾內堯舜弟兄中

二

制度移民俗文章變國風開成與貞觀實錄事多同

晏駕辭双闕靈儀出九衢上雲歸碧落下席葬蒼梧

莫晚餘堯曆龜新啓夏圖三朝聯棣萼從古帝王無

三

嚴恭七月禮哀慟萬人心地感勝秋氣天愁結夕陰
鼎湖龍漸遠濛汜日初沉唯有雲韶樂長留治世音

四

化成同軌表清平恩結連枝感聖明帝與九齡雖吉
夢山呼萬歲是虛聲月低儀杖辭蘭路風引笳簫入
栢成老病龍髯攀不及東周退傅寂傷情

時熱少客因詠所懷

冠櫛心多懶逢迎興漸微况當時甚熱幸遇客來稀
濕灑池邊地涼開竹下扉露床青篾簟風架白蕉衣
院靜留僧宿樓空放妓歸衰殘強歡宴此事久知非
宣州崔大夫閣老忽以近詩數十首見示吟

諷之下竊有所喜因成長句寄題郡齋

謝玄暉歿吟聲寢郡閣寥寥筆硯閒無復新詩題壁
上虛教遠岫列窓間謝宣城郡內詩忽驚歌雪今朝
至必恐文星昨夜還再喜宣城章句動飛觴遙賀敬

亭山

謝又有題敬亭山詩並見文選中

足疾

足疾無加亦不瘳綿春歷夏復經秋開顏且酌樽中
酒代步多乘池上舟幸有眼前衣食在兼無身後子
孫憂應須學取陶彭澤但委心形任去留

晚池汎舟遇景成詠贈呂處士

岸淺橋平池面寬飄然輕棹汎澄瀾風宜扇引開懷
入樹愛舟行仰臥看別境客稀知不易能詩人少詠

應難唯憐呂叟時相伴同把磻溪舊釣竿

夢微之

夜來携手夢同遊晨起盈巾淚莫收漳浦老身三度
病成陽宿草八迴秋君埋泉下泥銷骨我寄人間雪
滿頭阿衛韓郎相次去夜臺茫昧得知不阿衛微之
男韓郎

感秋詠意

炎涼遷次速如飛又脫生衣著熟衣遶壁暗蛩無限
思戀巢寒鷺未能歸須知流輩年年失莫歎衰容日
日非舊語相傳聊自慰世間七十老人稀

老病幽獨偶吟所懷

眼漸昏昏耳漸聾滿頭霜雪半身風已將心出浮雲
外維摩經云是
外身如浮雲也猶寄形於逆旅中鶻詠罷來閑閑
笙歌散後妓房空世緣俗念消除盡別是人間清淨
翁

和楊尚書罷相後夏日遊永安水亭兼招本

曹楊侍郎同行

道行無喜退無憂舒卷如雲得自由良冶動時為哲
匠巨川濟了作虛舟竹亭陰合偏宜夏水檻風涼不
待秋遙愛翩翩雙紫鳳入同官署出同遊

在家出家

衣食支吾婚嫁畢從今家事不相仍夜眠身是投林
鳥朝飯心同乞食僧清唳數聲松下鶴寒光一點竹
間燈中宵入定跏趺坐女喚妻呼多不應

夜涼

露白風清庭戶涼老人先著夾衣裳舞腰歌袖拋何處唯對無絃琴一張

繼之尚書自余病來寄遺非一又蒙覽醉吟

先生傳題詩以美之今以此篇用伸酬謝

衰殘與世日相踈惠好唯君分有餘茶藥贈多因病

久衣裳寄早及寒初所寄贈之物皆及時交情鄭重金相似詩

韻清鏘玉不如醉傅狂言人盡笑獨知我者是尚書

五年秋病後獨宿香山寺三絕句

經年不到龍門寺今夜何人知我情還向暢師房裏

宿新秋月色舊灘聲

三

飲徒歌伴今何在雨散雲飛盡不廻從此香山風月

夜祗應長是一身來

三

石盆泉畔石樓頭十二年來晝夜遊更過今年年七

十假如無病亦宜休

題香山新經堂招僧

烟滿秋堂月滿庭香花漠漠磬泠泠誰能來此尋真

諦白老新開一藏經

偶題鄧翁

公即給事中班之子也
飢窮老病退居此村

偶因携酒尋村客聊復廻車訪薜蘿且值雪寒相慰

問不妨春暖更經過翁居山下年空老我得人間事

校多一種共翁頭似雪翁無衣食自如何

早入皇城贈王留守僕射

津橋殘月曉沉沉風露淒涼禁署深
城柳宮槐謾搖落悲愁不到貴人心

寄題廬山舊草堂兼呈二林寺道侶

三十年前草堂主而今雖在髮如絲
登山尋水應無力不似江州司馬時
漸伏酒魔休放醉猶殘口業未拋
詩君行過到鑪峯下為報東林長老知

往題草堂中也

改業

先生老去飲無興居士病來閒有餘
猶覺醉吟多放逸不如禪坐更清虛
予先自醉吟先生傳令故云 柘枝紫袖教藥
羯鼓蒼頭遣種蔬却被山僧戲相問
一時改業意

何如

山下留別佛光和尚

勞師送我下山行此別何人識此情
我已七旬師九十當知後會在他生

山中五絕句

遊嵩陽見五物各有所感感興不同隨興而吟因成五絕

嶺上雲

嶺上白雲朝未散田中青麥旱將枯
自生自滅成何事能逐東風作雨無

石上苔

漠漠班班石上苔幽芳靜綠絕纖埃
路傍凡草榮遭遇曾得七香車輾來

林下櫛

香檀文桂苦雕鐫生理何曾得自全
知我無材老樗否一枝不損盡天年

澗中魚

海水桑田欲變時風濤翻覆沸天池
鯨吞蛟鬪波成血深澗遊魚樂不知

洞中蝙蝠

千年鼠化白蝙蝠黑洞深藏避網羅
遠害全身誠得計一生幽暗又如何

自戲三絕句

聞臥獨吟無人酬和聊假身心相戲往復偶成三章

心問身

心問身云何泰然嚴冬暖被日高眠
放君快活知恩否不早朝來十一年

自報心

心是身王身自宮君今居在我宮中
是君家舍君須愛何事論恩自說功

心重蒼身

因我踈慵休罷早遣君安樂歲時多
世間老苦人何限不放君閒奈我何

會昌元年春五絕句

病後喜過劉家

忽憶前年初病後此生甘分不銜盃
誰能料得今春事又向劉家飲酒來

贈舉之僕射

今春與僕射三為寒食之會

雞毬錫粥屢開筵談笑謳吟間管絃
一月三迴寒食

會春光應不負今年

盧尹賀夢得會中作

病聞川守賀筵開起伴尚書飲一盃任意少年長笑
我老人自覓老人來

題朗之槐亭

春風可惜無多日家醞唯殘軟半瓶猶望君歸同一
醉籃舁早晚入槐亭

勸夢得酒

誰人功畫麒麟閣何客新投魑魅鄉兩處榮枯君莫
問殘春更醉兩三場

過裴令公宅二絕句

招宴二物如
故因成感情

裴令公在日常同聽楊
柳枝歌每遇雪天無非

風吹楊柳出墻枝憶得同歡共醉時每到集賢坊地
過不曾一度不低眉

二

梁王舊館雪濛濛愁殺鄒枚二老翁此句兼
屬夢得假使明

朝深一尺亦無人到兔園中

百日假滿少傅官停自喜言懷

長告今朝滿十旬從茲蕭灑便終身老嫌手重拋牙
笏病喜頭輕換角巾踈傳不朝懸組綬尚平無累畢
婚姻人言世事何時了我是人間事了人

早熱

畏景又加旱火雲殊未收籬暄飢有雀池涸渴無鷗
岸幘頭仍痛褰裳汗亦流若為當此日遷客向炎州

時楊李二相
各貶潮韶

題崔少尹上林坊新居

坊靜居新深且幽忽疑縮地到滄洲
宅東籬缺嵩峯出堂後池開洛水流
高下三層盤野徑沿洄十里汎
漁舟若能為客烹鷄黍願伴田蘇日日遊

新澗亭

煙蘿初合澗新開閒上西亭日幾迴
老病歸山應未得且移泉石就身來

對酒有懷寄李十九郎中

往年江外拋桃葉結之也去歲樓中別柳枝楚蠻也寂寞

春來一盃酒此情唯有李君知吟詩舊句情難忘風

月何時是盡時李君嘗有悼故妓詩云直應人出無風月始是心中志却時今故云

楊六尚書頻寄新詩詩中多有思閒相就之

志因書鄙意報而諭之

君年殊未及懸車未合將閒逐老夫身
徒正宜金印綬位高方稱白髭鬚
若論塵事何由了但問雲心自在無
進退是非俱是夢丘中闕下亦何殊

偶吟自慰兼呈夢得予與夢得甲子同令俱七十

且喜同年滿七旬莫嫌衰病莫嫌貧
已為海內有名客又占世間長命人
耳裏聲聞新將相眼前失盡故交親
尊榮富壽難兼得閒坐思量最要身

寄潮洲繼之

相府潮陽俱夢中夢中何者是窮通
他時事過方應悟不獨榮空辱亦空

雪暮偶與夢得同致仕裴賓客王尚書飲

黃昏慘慘雪霏霏白首相歡醉不歸四箇老人三百

歲裴年九十餘五年八十餘予與夢得俱七十合三百餘歲可謂希有之會也人間此會

亦應稀

雪朝乘興欲詣李司徒留守先以五韻戲之

夜寒生酒思晚雪引詩情熱飲一兩盞冷吟三五聲

鋪花連地凍銷玉畏天晴好拂烏巾出宜披鶴氅行

梁園應有興何不召鄒生

贈思前以履道新小灘詩寄思黯報章云請向歸仁砌下看思黯歸仁宅亦有小灘

為憐清淺愛潺湲一日三迴到水邊若道歸仁灘更

好主人何故別三年

聽歌六絕句

聽都子歌詞云試問常娥更要無

都子新歌有性靈一聲格轉已堪聽更聽唱到常娥

字猶有樊家舊典刑

樂世一名六公

管急絃繁拍漸稠緣罽宛轉曲終頭誠知樂世聲聲

樂老病人聽未免愁

水調第五遍乃五言調韻最切

五言一遍最殷勤調少情多似有因不會當時翻曲

意此身腸斷為何人

想夫憐王維右丞詞云秦州一半夕陽開此句尤佳

玉管朱絃莫急催容聽歌送十分盃長愛夫憐第二

句請君重唱夕陽開

何滿子

開元中滄州有歌者何滿子臨刑進此曲以贖死上竟不免

世傳滿子是人名臨就刑時曲始成一曲四調歌八疊從頭便是斷腸聲

離別難詞

綠楊陌上送行人馬去車迴一望塵不覺別時紅淚盡歸來無可可乾霑巾

閒樂

坐安臥穩輿平肩椅杖披衫遶四邊空腹三盃卯後酒曲肱一覺醉中眠更無忙苦吟閒樂恐是人間自在天

白氏文集卷第三十五

白氏文集卷第三十六

半格詩

律詩附九首

立秋夕涼風忽至炎暑稍消即事詠懷寄汴

州節度使李二十尚書

嫋嫋簷樹動好風西南來紅缸霏微滅碧幌飄飄開披襟有餘涼拂簟無纖埃但喜煩暑退不惜光陰催河秋稍清淺月午方徘徊或行或坐卧體適心悠哉美人在浚都旌旗繞樓臺雖非滄溟阻難見如蓬萊蟬迎節又換鴈送書未迴君位日寵重我年日摧頽無因風月下一舉平生盃

開成二年夏聞新蟬贈夢得

十年來常與夢得索居同在洛

下每聞蟬多有寄卷今喜以此篇唱之

十載與君別常感新蟬鳴今年共君聽同在洛陽城
噪處知林靜聞時覺景清涼風忽嫋嫋秋思先秋生
殘槿花邊立老槐陰下行雖無索居恨還動長年情
且喜未聾耳年年聞此聲

題牛相公歸仁里宅新成小灘

平生見流水見此轉留連况此朱門內君家新引泉
伊流決一帶洛石砌千拳與君三伏月滿耳作潺湲
深處碧磷磷淺處清濺濺碕岸束鳴咽沙汀散淪漣
翻浪雪不盡澄波空共鮮兩崖灑瀨口一泊瀟湘天
曾作天南客漂流六七年何山不倚杖何水不停船
巴峽聲心裏松江色眼前今朝小灘上能不思悠然

春日閒居三首

陶云愛吾廬吾亦愛吾屋屋中有琴書聊以慰幽獨
是時三月半花落庭蕪_音舍上晨鳩鳴牕間春睡足
睡足起閒坐景晏方櫛沐今日非十齋庖童饋魚肉
飢來恣食歡冷熱隨所欲飽竟快搔把筋骸無檢束
豈徒暢肢體兼欲遺耳目便可傲松喬何假盃中綠

二

廣池春水平羣魚恣遊泳新林綠陰成衆鳥欣相鳴
韻時我亦瀟洒適無累與病魚鳥人則殊同歸於遂
性緬思山梁雉時哉感孔聖聖人不得所慨然歎時
命我今對鱗羽取樂成謠詠得所仍得時吾生一何
幸

三

勞者不覺歌歌其勞苦事逸者不覺歌歌其逸樂意
問我逸如何閒居多興味問我樂如何閒官少憂累
又問俸厚薄百千隨月至又問年幾何七十行欠二
所得皆過望省躬良可媿馬閒無羈絆鶴老有祿位
設自爲化工優饒只如是安得不歌詠默默受天賜

小閣閒坐

閣前竹蕭蕭閣下水潺潺拂簾卷簾坐清風生其間
靜聞新蟬鳴遠見飛鳥還但有巾掛壁而無客叩關
二踈返故里四老歸舊山吾亦適所願求閒而得閒
遊平泉宴浥澗宿香山石樓贈座客

逸少集蘭亭季倫宴金谷金谷太繁華蘭亭闕絲竹
何如今日會浥澗平泉曲盃酒與管絃貧中隨分足
紫鮮林筍嫩紅潤園桃熟採摘助盤筵芳滋盈口腹
閒吟暮雲碧醉藉春草綠舞妙艷流風歌清叩寒玉
古詩惜晝短勸我今秉燭是夜勿言歸相携石樓宿

池上幽境

裊裊過水橋微微入林路幽境深誰知老身閒獨步
行行何所愛遇物自成趣平滑青盤石低密綠陰樹
石上一素琴樹下雙草屨此是榮先生坐禪三樂處

夏日閒放

時暑不出門亦無賓客至靜室深下簾小庭新掃地
褰裳復岸憤閒傲得自恣朝景枕簟清乘涼一覺睡
午食何所有魚肉一兩味夏服亦無多蕉紗三五事
資身既給足長物徒煩費若比簞瓢人吾今太富

貴

和思黯居守獨飲偶醉見示六韻時夢得和
篇先成頗為麗絕因添兩韻繼而美之

宮漏滴漸闌城烏啼復歇此時若不醉爭奈千門月
主人中夜起妓燭前羅列歌袂默收聲舞鬟低赴節
絃吟玉柱品酒透金盃熱朱顏忽已醜清奏猶未闕
妍詞黯先唱逸韻劉繼發鏗然双雅音金石相磨戛
和夢得洛中早春見贈七韻

衆皆賞春色君獨憐春意春意竟如何老夫知此味
燭餘減夜漏衾暖添朝睡恬和臺上風虛潤池邊地
開蓮花養艷語懶鶯含思似訝隔年齋如勸迎春醉
何日同宴遊心期二月二此日出齋故云

櫻桃花下有感而作

開成三年春李美周賓客南池也

藹藹美周宅櫻繁春日斜一為洛下客十見池上花
爛熳豈無意為君占年華風光饒此樹歌舞勝諸家
失盡白頭伴長成紅粉娃白頭伴紅粉娃皆有所屬

洗竹

布裘寒擁頸氈履温承足獨立冰池前久看洗霜竹
先除老且病次去織而曲剪棄猶可憐琅玕十餘束
青青復篔簹頗異凡草木依然若有情迴頭語僮僕
小者截魚竿大者編茅屋勿作篲與箕而令糞土辱

新沐浴

形適外無恙心恬內無憂夜來新沐浴肌髮舒且柔

寬裁夾烏帽厚絮長白裘表溫裏我足帽暖覆我頭
先進酒一盃次舉粥一甌半酣半飽時四體春悠悠
是月歲陰暮慘冽天地愁白日冷無光黃河凍不流
何處征戍行何人羈旅遊窮途絕糧客寒獄無燈囚
勞生彼何苦遂性我何優撫心但自愧孰知其所由

三年除夜

晰晰燎火光氤氳臍酒香嗤嗤童稚戲迢迢歲夜長
堂上書帳前長幼合成行以我年取長次第來稱觴
七十期漸近萬緣心已忘不唯少歡樂兼亦無悲傷
素屏應居士青衣侍孟光夫妻老相對各坐一繩床

顧虎頭畫維摩居士圖白衣素屏也

自題小刺

不闔門館華不闔林園大但闔爲主人一坐十餘
迴看甲乙第列在都城内素垣夾朱門藹藹遙相對
主人安在哉富貴去不迴池乃爲魚鑿林乃爲禽栽
何如小園主拄杖閒即來親賓有時會琴酒連夜開
以此聊自足不羨大池臺

病中宴坐

有酒病不飲有詩慵不吟頭眩平聲罷垂鈎手痺休援
竟日悄無事所居閒且深外安支離體中養希夷
心窓戶納秋景竹木澄夕陰宴坐小池畔清風時動
襟

戒藥

促促急景中蠢蠢微塵裏生涯有分限愛戀無終已

早天羨中年中年羨暮齒又貪生服食求不死
朝吞太陽精夕吸秋石髓致福反成災藥誤者多矣
以之資嗜慾又望延甲子天人陰陽間亦恐無此里
域中有真道所說不如此後身始身存吾聞諸老氏

贈夢得

前日君家飲昨日王家宴今日過我廬三日三會面
當歌聊自放對酒交相勸爲我盡一盃與君發三願
一願世清平二願身強健三願臨老頭數與君相見

逸老

莊子云勞我以生逸我以老息我以死也

白日下駸駸青天浩浩人生在其中適時即爲好
勞我以少壯息我以衰老順之多吉壽違之或凶天
我初五十八息老雖非早一閒十三年所得亦不少
况加祿仕後衣食常溫飽又從風疾來女嫁男婚了
育中一無事浩氣凝襟抱飄若雲信風樂於魚在藻
桑榆坐已暮鍾漏行將曉皤然七十翁亦足稱壽考
筋骸本非實一束芭蕉草眷屬偶相依一夕同棲鳥
去何有顧戀住亦無憂惱生死尚復然其餘安足道
是故臨老心冥然合玄造

遇物感興因示子弟

聖擇狂夫言俗信老人語我有老狂詞聽之吾語汝
吾觀器用中劔銳鋒多傷吾觀形骸內骨勁齒先亡
寄言處世者不可苦剛強龜性愚且善鳩心鈍無惡
人賤拾支床鷓欺擒暖脚寄言立身者不得全柔弱
彼固罹禍難此未免憂患平于何保終吉強弱剛柔

間上遵周孔訓旁鑒老莊言不唯鞭其後亦要軛其先

首夏南池獨酌

春盡雜英歇夏初芳草深薰風自南至吹我池上林
綠蘋散還合頰鯉跳復沉新葉有佳色殘鷺猶好音
依然謝家物池酌對風琴慙無康樂作秉筆思沉吟
境勝才思劣詩成不稱心

官俸初罷親故見憂以詩諭之

七年爲少傅品高俸不薄乘軒已多慙况是一病鶴
又及懸車歲筋力轉衰弱豈以貧是憂尚爲名所縛
今春始病免纓組初擺落蜩甲有何知雲心無所著
困中殘舊穀可備歲飢惡園中多新蔬未至食菘菹

不求安師卜不問陳生藥但對丘中琴時開池上酌
信風舟不繫掉尾魚方樂親友不我知而憂我寂寞

安與陳皆洛下藝術精者

閒居偶吟招鄭庶子皇甫郎中

自哂此迂叟少迂老更迂家計不一問園林聊自娛
竹間琴一張池上酒一壺更無俗物到但與秋光俱
古石蒼錯落新泉碧縈紆焉用車馬客即此是吾徒
不有所思人各在城一隅杳然愛不見搔首方踟躕
玄晏風韻遠子真雲貌孤誠知厭朝市何必憶江湖
能來小澗上一聽潺湲無

亭西墻下伊渠水中置石激流潺湲成韻頗

有幽趣以詩記之

嵌巉嵩石峭皎潔伊流清立爲遠峯勢激作寒玉聲
夾岸羅密樹面灘開小亭忽疑巖子瀨流入洛陽城
是時群動息風靜微月明高枕夜悄悄滿耳秋冷令
終日臨大道何人知此情此情苟自愜亦不要人聽
間題家池寄王屋張道士

有石白磷磷有水清潺潺有叟頭似雪婆娑乎其間
進不趨要路退不入深山深山大濩落要路多險艱
不如家池上樂逸無憂患有食適吾口有酒醅吾顏
恍惚遊醉鄉希夷造玄關五千言下悟十二年來間
富者我不顧貴者我不攀唯有天壇子時來一往還

李盧二中丞各創山居俱誇勝絕然去城稍
遠來往頗勞弊居新泉實在宇下偶題十

五韻聊戲二君

龍門蒼石壁

李所
有也

滄澗碧潭水

盧所
有也

各在一山隅迢

遙幾十里清鏡碧屏風惜哉信爲美愛而不得見亦
與無相似聞君每來去矻矻事行李脂轄復裹粮心
力頗勞止未如我舍下石與泉甚邇鑿鑿復濺濺晝
夜流不已洛石千萬拳襯波鋪錦綺海民一兩片激
灑含宮徵綠宜春濯足淨可朝漱齒遶砌紫鱗遊拂
簾白鳥起何言履道叟便是滄浪子君若赴歸程請
君先到此願以潺湲聲洗君塵土耳

北窓竹石

一片瑟瑟石數竿青青竹向我如有情依然看不足
况臨北窓下復近西塘曲筠風散餘清苔雨含微綠

有妻亦衰老有子方乳獨莫掩夜窓扉共渠相伴宿
飲後戲示弟子

吾爲爾先生爾爲吾弟子孔門有遺訓復坐吾告爾
先生饌酒食弟子服勞止孝敬不在他在茲而已矣
欲我少憂愁欲我多歡喜無如醞好酒酒須多且旨
旨即賓可留多即壘不耻吾更有一言爾宜聽入耳
人老多憂貧人病多憂死我今雖老病所憂不在此
憂在半酣時樽空坐客起

閒坐看書貽諸少年

雨砌長寒蕪風庭落秋果窓間有閒叟盡日看書坐
書中見往事歷歷知福禍多取終後亡疾驅必先墮
勸君少干名名爲錮身鑠勸君少求利利是焚身火

我心知己久吾道無不可所以雀羅門不能寂寞我

夢上山

時足疾未平

夜夢上嵩山獨携藜杖出千巖與萬壑遊覽皆周畢
夢中足不三捷似少年日既悟神返初依然舊形質
始知形神內形病神無疾形神兩是幻夢悟俱非實
晝行雖蹇澁夜步頗安逸晝夜旣平分其間何得失

對酒閒吟贈同老者

人生七十稀我年幸過之遠行將盡路春夢欲覺時
家事口不問世名心不思老旣不足歎病亦不能治
扶持仰奴僕將養信妻兒飢飽進退食寒暄加減衣
聲妓放鄭衛裘馬脫輕肥百事盡除去尚餘酒與詩
興來吟一篇吟罷酒一卮不獨適情性兼用扶衰羸

雲液洒六腑陽和生四肢於中我自樂此外吾不知
寄問同老者捨此將安歸莫學蓬心叟胷中殘是非

晚起間行

皤然一老子擁裘仍隱几坐穩夜忘眠臥安朝不起
起來無可作閉目時叩齒靜對銅爐香暖漱銀瓶水
午齋何儉潔餅與蔬而已西寺講楞伽間行一隨喜

香山居士寫真詩

并序

元和五年予爲左拾遺翰林學士奉詔寫真於集賢
殿御書院時年三十七會昌二年罷太子少傅爲白
衣居士又寫真於香山寺藏經堂時年七十一前後
相望殆將三紀觀今照昔慨然自歎者久之形容非
一世事幾變因題六十字以寫所懷

昔作少學士圖形入集賢今爲老居士寫貌寄香山
鶴毳變玄髮雞膚換朱顏前形與後貌相去三十年
勿歎韶華子俄成皤叟仙請看東海水亦變作桑田
二年三月五日齋畢開素當食偶吟贈妻弘

農郡君

睡足肢體暢晨起開中堂初旭泛簾幕微風拂衣裳
二婢扶盥櫛双童昇簟床庭東有茂樹其下多陰涼
前月事齋戒昨日散道場以我久蔬素加籩仍異糧
魴鱗如白雪蒸炙加桂薑稻飯紅似花調沃新醪漿
佐以脯醢味間之椒薤芳老憐口尚美病喜鼻聞香
嬌駮三四孫索哺遶我傍山妻未舉案饒叟已先嘗
憶同車色初家貧共糟糠今食且如此何必烹猪羊

沉觀姻族間夫妻半存亡借老不易得白頭何足傷
食罷酒一盃醉飽吟又狂緬想梁高士日道喜文章
徒誇五噫作不解贈孟光

不出門

彌月不出門永日無來賓食飽更拂床睡覺一頓伸
輕箠白鳥羽新篔簹青箭筠方寸方丈室空然兩無塵
披衣鬢不帶散髮頭不巾袒跣北窓下葛天之遺民
一日亦自足況得以終身不知天壤內自我爲何人

感舊

故李侍郎杓直長慶元年春薨元相公微之太和六
年秋薨崔侍郎晦叔大和七年夏薨劉尚書夢得會
昌二年秋薨四君子予之執友也三十年間周處其

盡唯予衰病至今獨存因詠悲懷題爲感舊

晦叔墳荒草已陳夢得墓濕土猶新微之捐館將一
紀杓直歸丘二十春城中雖有故第宅庭蕪因廢生
荆榛篋中亦有舊書札紙穿字蠹成灰塵平生定交
取人窄屈指相知唯五人四人先去我在後一枝蒲
柳衰殘身豈無晚歲新相識相識面親心不親人生
莫羨苦長命長命感舊多悲辛

送毛仙翁

江州司馬
馬時作

仙翁已得道混迹尋巖泉肌膚冰雪瑩衣服雲霞鮮
紺髮絲並綴齟齬容花共妍方瞳點玄漆高步凌飛烟
幾見桑變海莫知龜鶴年所憇九清外所遊五嶽巔
軒昊舊爲侶松喬難比肩每嗟人世入役役如狂顛

孰能脫羈鞅盡遭名利牽貌隨歲律換神逐光陰遷
惟余負憂譴憔悴益江壖衰髮忽霜白愁腸如火煎
羈旅坐多感徘徊私自憐晴眺五老峯玉洞多神仙
何當憫湮厄授道安虛辱我師惠然來論道窮重玄
浩蕩八溟闊志泰心超然形骸既無束得喪亦都捐
豈識椿萱異那知鵬鷲懸丹華既相付促景定當延
玄功曷可報感極惟勤拳霓旌不肯駐又歸武夷川
語罷倏然別孤鶴昇遙天賦詩叙明德永續步虛篇

達哉樂天行

達哉達哉白樂天分司東都十三年七旬纔滿冠已
挂半祿未及車先懸或伴遊客春行樂或隨山僧夜
坐禪二年忘却問家事門庭多草厨少烟庖童朝告
鹽米盡侍婢暮訴衣裳穿妻孥不悅甥姪悶而我醉
臥方陶然起來與爾畫生計薄產處置有後先先賣
南坊十畝園次賣東郭五頃田然後兼賣所居宅鬻
鬻獲緡二三千半與尔充衣食費半與吾供酒肉錢
吾今已年七十一眼昏鬚白頭風眩但恐此錢用不
盡即先朝露歸夜泉未歸且住亦不惡飢食樂飲安
穩眠死生無可無不可達哉達哉白樂天

春池閒汎律詩

綠塘新水平紅檻小舟輕解纜隨風去開襟信意行
淺憐清演漾深愛綠泓澄白撲柳飛絮紅浮桃落英
古文科斗出新葉剪刀生樹集鸞朋友雲行鴈弟兄
飛沉皆適性酣詠自怡情花助銀盃器松添玉軫聲

魚跳何事樂鷗起復誰驚莫唱滄浪曲無塵可濯纓

池上寓興二絕

濠梁莊惠謾相爭未必人情知物情獺捕魚來魚躍
出此非魚樂是魚驚

二

水淺魚稀白鷺飢勞心瞪目待魚時外容閒暇中心
苦似是而非誰得知

宴後題府中水堂贈盧尹中丞

水齋歲久漸荒蕪自愧甘棠無一株新酒客來方宴

飲舊堂主在重歡娛莫言楊柳枝空老

府妓有歌揚柳枝曲者因以名直致櫻桃樹已枯府西有櫻桃園因樹從我到

君卜一尹相看自置府中無自予罷後至中丞也

和敏中洛下即事

昨日池塘春草生阿連新有好詩成花園到處鸞呼

入駿馬遊時客避行水暖魚多似南國人稀塵少勝

西京洛中佳境應無限若欲諳知問老兄

送敏中新授戶部員外郎西歸

千里歸程三伏天官新身健馬翩翩行衝赤日加餐

飯上到青雲穩著鞭長慶老郎唯我在客曹故事望

君傳前鴻後鴈行難續相去迢迢二十年長慶初予為主客郎

中知制誥遷中書舍人去年十一月也

南侍御以石相贈助成水聲因以絕句謝之

泉石磷磷聲似琴閒眠靜聽洗塵心莫輕兩片青苔

石一夜潺湲直萬金

閒居自題戲招宿客

水畔竹林邊閒居二十年
健常携酒出病即掩門眠
解綬收朝佩褰裳出野舩
屏除身外物擺落世間緣
報曙窓何早知秋簟最先
微風深樹裏斜日小樓前
渠口添新石籬根寫亂泉
欲招同宿客誰解愛潺湲

西亭墻下
泉石有聲

李留守相公見過池上汎舟舉酒話及翰林

舊事因成四韻以獻之

引棹尋池岸移樽就菊叢
何言濟川後相訪釣舩中
白首故情在青雲往事空
同時六學士五相一漁翁

閏九月九日獨飲

與花叢畔綠樽前猶有些些舊管絃
偶遇閏秋重九

日東籬獨酌一陶然
自從九月持齋戒不醉重陽十
五年

覽盧子蒙侍御舊詩多與微之唱和感今傷

昔因贈子蒙題於卷後

早聞元九詠君詩恨與盧君相識遲
今日逢君開舊卷卷中多道贈微之
相看掩淚情難說別有傷心事
豈知聞道咸陽墳上樹已抽三丈白楊枝

寒亭留客

今朝閒坐石亭中
爐火銷殘樽又空
冷落若爲留客
住冰池霜竹雪髯翁

新小灘

石淺沙平流水寒
水邊斜插一漁竿
江南客見生鄉

思道似嚴陵七里灘

和李中丞與李給事山居雪夜同宿小酌

憲府觸邪裁豸角二人當官盛事環駁正犯龍鱗為時所稱也

那知近地齋居客忽作深山同宿人一盞寒燈雲外

夜數盃温耐雪中春林泉莫作多時計諫獵登封憶

舊臣

履道西門二首

履道西門有弊居池塘竹樹遶吾廬豪華肥壯雖無

分飽暖安閒即有餘行竈朝香炊早飯小園春暖撥

新蔬夷齊黃綺誇芝蕨北我盤飧恐不如

二

履道西門獨掩扉官休病退客來稀亦知軒冕榮堪

戀其柰田園老合歸波鼈難隨騏驥足傷禽莫趁鳳

凰飛世間認得身人少今我雖愚亦庶幾

偶吟

人生變改故無窮昔是朝官今翁久寄形於朱紫

內漸抽身入蕙荷中荷衣蕙帶皆楚詞也無情水任方圓器不

繫舟隨去住風猶有鱸魚蓴菜與來春或擬往江東

雪夜小飲贈夢得

同為懶慢園林客共對蕭條雨雪天小酌酒巡銷永

夜大開口笑送殘年久將時背成遺老多被人呼作

散仙呼作散仙應有以曾看東海變桑田

歲暮夜長病中燈下聞盧尹夜宴以詩戲之

且為來日張本也

榮開與多嫌晝短衰閒睡少覺明遲當君秉燭銜盃
夜是我停食服藥時枕下愁吟堪發病府中歡笑勝
尋醫明朝強出須謀樂不擬車公更擬誰

病中數會張道士見譏以此荅之

亦知數出妨將息不可端居守寂寥病即藥窓眠盡
日與來酒席坐通宵賢人易狎須勤飲姹女難禁莫
慢燒張道士輸白道士一盃沆瀣便逍遙

卯飲

短屏風掩卧床頭烏帽青氈白氎裘卯飲一盃眠一
覺世間何事不悠悠

寄題餘杭郡樓兼呈裴使君

官歷二十政宦遊三十秋江山與風月最憶是杭州

北郭沙堤尾西潮石岸頭綠觴春送客紅燭夜迴舟
不敢言遺愛空知念舊遊憑君吟此句題向望濤樓

楊六尚書留太湖石在洛下借置庭中因對

舉盃寄贈絕句

借君片石意何如置向庭中慰索居每就玉山傾一
酌興來如對醉尚書

喜入新年自詠時年七十一

白鬚如雪五朝臣又值新正第七旬老過占他藍尾
酒病餘收得到頭身銷磨歲月成高位北類時流是
幸人大曆年中騎竹馬幾人得見會昌春

灘聲

碧玉班班沙歷歷清流泱泱響泠泠自從造得灘聲

後玉管朱絃可要聽

老題石泉

殷勤傍石遶泉行不說何人知我情漸恐耳聾兼眼
暗聽泉看石不分明

送王卿使君赴任蘇州因思花迎新使感舊

遊寄題郡中木蘭西院一別

一別蘇州十八載時光人事隨年改不論竹馬盡成
人亦恐桑田半為海鶯入故宮含意思花迎新使生
光彩為報江山風月知至今白使君猶在

出齋日喜皇甫十早訪

三旬齋滿欲銜盃平旦敲門門未開除却朗之携一
盃的應不是別人來

會昌二年春題池西小樓

花邊春水水邊樓一坐經今四十秋望月橋傾三遍
興採蓮船破五迴脩園林一半成喬木鄰里三分作

白頭蘇李冥蒙隨燭滅陳樊漂泊逐萍流蘇庶子弘
李中丞道

樞及陳樊二妓十餘年皆樓中
歌酒中伴或歿或散獨予在焉雖貧眼下無妨樂縱

病心中不與愁自笑靈光巋然在春來遊得且須遊

酬南洛陽早春見贈

物華春意尚遲迴賴有東風晝夜催寒縋柳腰收未
得暖熏花口噤初開古詩云口
噤不能開欲披雲霧聯襟去先

喜瓊琚入袖來久病長齋詩老退爭禁年少洛陽才

對新家醞翫自種花

香麴親看造芳叢手自我迎春報酒熟垂老看花開

紅蠟半含萼綠油新醖醅玲瓏五六樹漱澗兩三盃
恐有狂風起愁無好客來獨酣還獨語待取月明迴
携酒往朗之莊居同飲

慵中又少經過處別後都無勸酒人不挈一壺相就
醉若為將老度殘春

以詩代書酬慕巢尚書見寄

慕巢書中頗切
白以休結侶之意

故以此答

書意詩情不偶然若云夢想在林泉願為愚谷烟霞
侶思結空門香火綠每愧尚書情眷眷自憐居士病
綿綿不知待得心期否老校於君六七年

春盡日

芳景銷殘暑氣生感時思事坐含情無人開口其誰

語有酒迴頭還自傾醉對數叢紅芍藥渴嘗一盃綠

昌明

蜀茶之名也

春歸自遣鶯留語好仁林園三兩聲

招山僧

能入城中乞食否莫辭塵土污袈裟欲知住處東城
下遶竹泉聲是白家

夏日與間禪師林下避暑

洛景墻西塵土紅伴僧間坐竹泉東綠蘿潭上不見
日白石灘邊長有風熱開漸知隨念盡清涼常願與
人同每因毒暑悲親故多在炎方瘴海中

是歲潮郡
等郡皆有

親友
諷居

題新澗亭兼酬寄朝中親故見贈

何處披襟風快哉一亭臨澗四門開金章紫綬辭腰

去白石清泉就眼來自得所宜還獨樂各行其志莫
相哈禽魚出得池籠後縱有人呼可更廻

病中看經贈諸道侶

右眼昏花左足風金篦石水用無功金篦刮眼病見
涅槃經磁石水

治風見外臺方不如廻念三乘樂便得浮生百疾空無子同

居草庵下見法華經有妻偕老道場中何煩更請僧為侶

月上新歸侍病翁時適談氏女子自太原初
歸維摩詰有女名月上也

遊豐樂招提佛光三寺

竹鞋葵扇白絹巾林野為家雲是身山寺每遊多寄

宿都城暫出即經旬漢容黃綺為逋客堯放巢由作

外臣昨日制書臨郡縣不談愚谷醉鄉人

醉中得上都親友書以予停俸多時憂問貧

乏偶乘酒興詠而報之

頭白醉昏昏狂歌秋復春一生耽酒客五度棄官人

蘇州刑部侍郎河南尹同州刺史太子少傅皆以病免也異世陶元亮前生劉伯

倫臥將琴作枕行以鍾隨身歲要衣三對年支穀一

困園葵烹佐板秋葉掃添薪沒齒甘蔬食搖頭謝縉

紳自能拋爵祿終不惱交親但得盃中綠從生甑上

塵煩君問生計憂醒不憂貧

池畔逐涼

風清泉冷竹修修三伏炎天涼似秋黃犬引迎騎馬

客青衣扶下釣魚舟衰容自覺宜閒坐蹇步誰能更

遠遊料得此身終老處只應林下與灘頭

池鶴八絕句

池土有鶴介然不群烏為鷄鶩
次第朝噪諸禽似有所謂鶴亦

時復一鳴予非治長不通其意因戲
與贈答以意斟酌之聊亦自取笑耳

鷄贈鶴

一聲驚露君能薄五德司晨我用多
不會悠悠時俗士重君輕我意如何

鶴答雞

爾爭伉儷泥中鬪吾整羽衣松上棲
不可遣他天下眼却輕野鶴重家雞

烏贈鶴

與君白黑太分明縱不相親莫見輕
我每夜啼君怨別玉微琴裏忝同聲

鶴答烏

吾愛棲雲上華表汝多攫肉下田中
吾音中羽汝聲

角琴曲雖同調不同

別鶴怨在羽調
烏夜啼在角調

鳶贈鶴

君誇名鶴我名鳶君叫聞天我戾天
更有與君相似處飢來一種啄腥羶

鶴答鳶

無妨自是莫相非清濁高低各有歸
鸞鶴群中彩雲裏幾時曾見喘鳶飛

鳶贈鶴

君因風起入青雲我被人驅向鴨群
雪頸霜毛紅網掌請看何處不如君

鶴答鵝

右軍歿後欲官依只合隨雞逐鴨飛
未必犧牲以吾

輦大都我瘦勝君肥

談氏小外孫玉童

外翁七十孫三歲笑指琴書欲遣傳自念老夫今耄
矣因思稚子更茫然中郎餘屢鍾羊祜子幼能文似
馬遷才與不才爭料得東床空後且嬌憐談氏初逝

送後集往廬山東林寺兼寄雲峯上人

後集寄將何處去故山迢遞在匡廬舊僧獨有雲峯
在三二年來不得書別後道情添幾許老來筋力又
何如來生緣會應非遠彼此年過七十餘

客有說

客即李浙東也所說不能具錄其事

近有人從海上迴海山深處見樓臺中有仙龕虛一
室多傳此待樂天來

荅客說

吾學空門非學仙恐君此說是虛傳海山不是我歸
處歸即應歸兜率天予晚年結彌勒上生業故云

哭劉尚書夢得二首

四海齊名白與劉百年交分兩綢繆同貧同病退閒

日一死一生臨老頭盃酒英雄君與操曹公曰天下英雄唯使君

文章微婉我知丘仲尼云後世知丘者春秋賢又云春秋之旨微而婉也

豪雖歿精靈在應共微之地下遊

二

今日哭君吾道孤寢門淚滿白髭鬚不知箭折弓何
用兼恐脣亡齒亦枯窅窅窮泉埋寶玉駸駸落景掛
桑榆夜臺暮齒期非遠但問前頭相見無

白氏文集卷第三十六

圖

